

Pizokel Kligga

Ausschnitte aus dem Programm 2006

Tuani wia so oft - im Fernseh uma zappa,
frogi mi, für was gib i denn däna mini Rappa!
Halb nackt rüaft miar plötzlich eini zua uf RTL,
„Ruf mal an“ wennis goht aber hüper mega schnell.
Allna Männer do - sägand miar nu ais,
lönd eu nit vur Frau verwütscha - das git a huara Mais!

A propos Fernseh luaga - do muass i zerscht erklära!
I luaga TSO und das no würckli koga gära!
A Hocka häts dabi und das tuat miar so schurig weh,
d' Bilder zu da Wörter - kasch erscht viel spöter gseh!
Würd a Sexfilm laufa uf am Sender TSO,
hätens Hosa nonit dunna - so wär der Schuss scho koh!

Hoch doba in da Berga - do isches zimkli ruch,
vo döta kund der Mister Schweiz, bekannt au als Heubuch.
Dr Renzo Bluamathal dä dörf sich schurig hoch erfreua,
as Johr go Kölla macha, statt ins Val Lumnez go hoia
Ir Pisa Sendig stönd miar Bündner do wia blödi Affa,
doch wenn so schön bisch muasch für d' Subvensiona nümme go schaffa!

Z' Bündnerland im Ufruar, was isch dänn do au gscheh?
Ma hegi uf am Ofapass as Jugobärli gseh.
Dr' Brosi nimmt sis Gwehr in Anschlag zum a Schuss platziara!
Halt stopp, das isch doch d' Lea mitem Mantel am spaziara!
Momol kai Angscht, as hät na geh dä Bär, namens Lumpaz,
d' Lea well der alt verkaufa - und suachi nu Ersatz!

Stapo hät zwei Unterländer müassa zünftig büassa,
well si im Araschgarangg - händ Pipi macha müassa!
Mit am Finger zeigt dr Polizischt aba uf Chur,
jo, mit da Buassa sind mir halt do doba zimkli stur.
Fürs normala Brunza hättis nu Verwarnig ge,
doch schins hegens dr Nama Uali - brünzlat in da Schnee!

Z' Tschutti Fiaber hät üs packt- dank am Köbi Kuhn,
jetz luagamer nümme Aarau - gäg da FC Thun!
Jo miar Schwizer sin in Dütschland ganz klar dabi,
spielend gäga Brasila oder gäga Germany!
D' Chanca im Final go gwinna dia isch kaiba kli,
well Türka, wo miar sicher schlönd - dia sind jo nit dabi!

Feria macha, guat go essa, wandera und no skina,
das isch dr Werbeslogan gsi vom Grand Hotel Alpina.
Am Obet dänn im Spiessal törfa Zinsli Musik losa,
Steak's und Suppa ässa innra faina Pilzli Sosa.
Noch am ässa ghört ma sicher niamert umma Motza,
well dia maischta Gäscht sind uf dr' Schissi duss am kotza!

Könn ihar eu erinnera, vor öppa viarzig Johr,
zum Sufa isch no z'Kiffa koh und au di langa Hoor!
Jo so gohts im Läba – as schlot scho uf da Maga
Dänn au da Drögeler gots aso und z'Alter fot a knaga.
As Altersheim für Alti Fixer – dänn sig ma scho dabi,
drum züchens vom Fontanapark - scho bald ins Botmer i!

Wetsch hützutags Kalender macha, isch das koga schwär,
z'Bildmotiv isch haikel und beiflusst z'Echo sehr!
Tusach Panzer MG HG und Kanona uf dia Bilder,
gail findet das nu z'EMD d'Rekruta kriagsch nit wilder!
Uf der Luzisteig tüans endlich wildi Bilder schüssa,
In Hudara vor Armee kasch jetzt - dia blutta Mutti gnüssa!

I hocka jetz im Himmel - und tuan uf d'Erda gaffa,
han nu in miner Stammpaitz wella gmütlich eini paffa!
Kum hanni in d'Sack glangt - zum Zigi fürahola,
do luagt mi z'Personal a - als hätti öppis gstohla!
I steck si wäg, sisch gsünder - und tuan no Rappa spara,
bin us dr Paitz, do hät mi so - a Tubel überfahra!